

桃園市115年語文競賽區複賽臺灣客語朗讀國小組(詔安腔)

【噓！恬恬仔聽】劉玉蕉原作

「噓！恬恬……，你人聽望，有麼个聲？」課上到一半，先生歇落來，佢个天才先生又討變鬼變怪啊！

「隔壁先生个聲大到像鳴雷公！」「低年級个讀書聲真好聽！」「有蟬吱个聲！」……。「鳴～～」教室一恬靜，空氣凝結，同學一個個像樹頭人共樣，目呆呆个、嘴擘擘个……，先生睜著佢人微微笑，課接落教，今日佢討紹介个即係「東勢舊山線」。

「鳴～～」空氣內又傳來舊式老火車个聲說，先生講：「你人想會著成過火車衝火煙个情景無？」係哦！對老輩个東勢人來講，遐聲說、遐散在田洋、山園、河溪个白煙，係親切嘛係燒暖。藍色个火車嬾逐日拖著四、五節車廂，晨早時頭和大雪山山背个日頭比勢早，佷暗加上西片裡紅霞个光，像蛇恁寬寬破對田園過。「確樂、確樂～～」「火車來啊哦！」做田事个大人探頭，細子和火車走相捎，連火車路路脣个花花草草嘛頓頭相借問，火車「鳴～～」一聲，拗佢人講「正來寮」，攔噴一笕煙即攞手離開。

「勢早！」像沙連溪个魚崽恁个人陣，逐日準時準點對火車頭个大門出出入入。晨早、烏昏坐火車个人較多，無礙著清風趁入車廂底个悠閒，窗門撻向上，外頭个好景色即接目咻个過，田洋跨四季變化，逐日坐火車个人定著會有體會。臥頭係遠遠近近个青山，一座接一座，佢个好朋友，係卡厥頸攪厥腰个白雲，好天否天个時，攞有佢人友誼个方式。

「鳴～～」討過溪啊！大甲溪在腳下，激起一湧一湧个浪花，帶來一聲連一聲个雜念，出豐原个人客會收著佢个「加油」；轉東勢个人客會接著佢遐聲「辛苦啊哦！」逐日無變。這兜好景色，直直到火車頭廢莫、鐵枝拆莫，都猶深深刻在老輩東勢人个腦海底。

「鳴～～」今這滿一日兩枋个小火車，係東勢客家園區仿早期東勢線个老火車，跨舊月臺脣設个遊寮場。先生講遐聲哨、形體款式和原本个衝煙火車有成，毋過，坐過得人鼻空烏去个老式火車，這仿來个玩具小火車，撻兩輪，哪會過願！

桃園市115年語文競賽區複賽臺灣客語朗讀國小組(詔安腔)

【去睭阿公阿媽】胡明華原作

討轉去睭阿公阿媽啊，歸屋下人攏真暢。前一暗夜阿怙阿依直頭吩咐阿立愛較早跋起來，毋會用賴睡。因為阿公阿媽蹣在山嶼壁角，阿立歸屋下人愛坐火車盤兩擺車，攔行十外分鐘正會到位置，若講傷晝正出發，可能赴毋會著食暗頓。

阿立頭愛跔阿公去屋脣个樹林捉蟲賞，書本有教个蟲，差不多逐種都尋會著。笏角蟲、草蟪、鍬形蟲、蝶、蚌蛻、花姑，討尋毋驚尋無。

阿媽真惜阿立，見擺阿立轉來，佢即會撥工做糝得這個糖霜丸个食，糝即係佢兩媽孫个秘密。阿媽毋知哪位來个本等，總係臆會著這個心肝寶貝孫恰意麼个賞物，兩儕總會聘好後次擺阿媽討送阿立麼个好賞个物件，阿立即恁望著和阿媽攔見面。

無想著，阿立這擺轉去，正知阿公前一駁子行路無細義跌斷腳骨，這滿愛擎怙杖正會用停動，連行都無利便啊。阿媽个手嘛著傷，歸隻手包藥膏，莫講落灶下做糝，連自家食物件都攏有困難。

阿公阿媽無法度陪佢賞啊，阿立感覺真失望，一路盤山過嶺

來尋阿公阿媽賞，結果嘎變做恁。佢儘採問¹過人了後，即面臭臭藏入房間底，毋出聲氣勃勃，佢越想越毋甘願。

俛暗个時，阿怙阿依拗阿立喊出房間，旨等阿立開嘴，阿怙榨²得佢一個袋，阿立打開來睭，內底係佢望想真久个變形金剛，這擺會用展寶得同學睭啊。

「你知道這係阿媽手著傷了後撥工落山去買得你个無？」阿依講。「吓？」阿立著驚下，想著自家毋插阿媽个態度，感覺真見笑。

續落來阿怙又提出一個供蟲用个盒，內底猶有一隻雞油姑。阿立睭了面紅激激感覺猶較否勢，頭犁犁細細聲問：「係阿公抑係阿媽買个？」阿怙講：「阿媽買个盒，你阿公自家捉个雞油姑！」

阿立越想越感覺無應該，佢想著阿公阿媽恁惜自家，著傷啊猶想著愛準備得自家个物件。顛倒係佢，正知顧自家，歸下無想著阿公阿媽著傷啊有幾艱難。佢這滿清醒啊，決定無愛做一個毋知天地个細子，等下即去拗阿公阿媽會失禮，順續使妮一下，佢想：「麼儕喊阿公阿媽恁惜佢呢？」

¹ 問：音 mun^ˆ；此指對人打招呼。

² 榨：音 zud^ˊ；塞，此處指塞給東西。

桃園市115年語文競賽區複賽臺灣客語朗讀國小組(詔安腔)

【上場】徐佳妤原作

「防守、防守、防守……大火鑊來啊！」「三分線，咻！抔入去啊，好球，哈哈，真慶！」佢真享受睇籃球比賽，因為會用放勢大聲喝，所有個煩惱一瞞目攞會毋見了了。

記得讀小學四年，遐時務林書豪渡紐約尼克隊連續得著好成績，全世界攞拗佢喝咻。因為這臨旋風，五年級個佢決定去考籃球體育班。恁好運，得佢考著啊，無想著嘎係辛苦個開始。逐晨早七點半到位學校訓練兩點鐘，放轉去了後，猶愛攞練點半鐘，練煞，歸班愛在教室寫了功課正會用轉去。落尾練到逐個人，走運動坪十外輪攞係小可事情。因為有同學做伴，猶有自家對籃球個熱情，佢毋識喝恹。

見擺有比賽，爺哀攞真無閒：愛準備食個、愛翕相和錄影、愛做啦啦隊，三不二時猶愛駛車載佢人去比賽，屋下人個支持即係球員頭大個力量。爺哀睇著佢在球場上有好表現，攞會直直拍手；若係球得人抄走¹啊，即真緊張，會在脣頭安慰講：「無要緊，正攞來。」一場比賽落來，大家攞走到氣喘喘又流汗答滴，

¹ 抄走：音 saˋ zeuˋ；籃球術語，此指「抄到球」。

愛目珠跔球、接好球、投入籃框內底，若係打無好，歇個時會得教練嚷：「你人愛保護球，莫惹惹得人抄啊，愛走位擋人……。」大家著面粹汗著面淋水，專心恬恬聽，毋敢啟大氣。

打球，手腳難免會著傷，有時務無堵好，膝頭碰著、腳撓著²、腳盤得人蹬著，積血、烏青、勾筋係真平常個。佢毋驚得醫生睇、做復健，即驚傷重抑係功課無寫了，教練毋得佢上場，正會用坐凳頭，遐時務心內個毋甘願比訓練猶較苦咧。

小學個籃球生活，得佢無時間上網賞遊戲，毋單功課進步啊，身體變到真勇，嘛學習著仰子和人合作，正經體會著這句事：「贏球莫風神，輸球莫失志。」無論輸贏，攞得佢成長真多。

² 撓著：音 nauˋ choo；扭到。